

Hibru

Whinė Naalemané ensel-rape teteró beterapó

¹ Mo take bitiré wouraalu, Kótóné fo kae kae tumó, ama kóló whirapepaae mo dekéro félimó depa, atimanémo dā Juda fakené noutererapepaae dua ipakalepó.

² Téyaletēi, mió i kemeratere alimó, ti Kótóné dere fo ama Naalemané dapaae yalepó. Ti fea ɔla ɔla ai naalené amatóro sópóló yóo, sáro haetamo ó ere ɔla ɔlakélé fea ama aleyópóló, Kótóné ai sekéné naase tuamó mulóo, yalepó.

³ Kótóné ama mo kae ere dē wisinaale ai naale tuamó deyó faletei, mo so whi feané kolópóló hakearó beterapó. So whiné ai naale kilitu, ama alima ere alatóro erapóló tuénérápó. Samó ó i haemó betere ɔla ó ere ɔla feané du betere ala hāle deté fu beterópóló, ai naalené doasi fotokó bole foné hāle eratétóro fu beterapó. So whi feané dowi ala fokóló kemetepa, ɔ hepen-paae fóló, wisi wisi ala fea teteróló betere Doasi betere turu naase demó betalepó.

⁴ Atéturaalu, Kótóné ɔ mulale doiné *ensel-rape* mulale doi teteró biture kaae, ɔ sóro betemale alanékélé, *ensel-rape* sóro betemale ala mo bosenóló teraae falapó.

⁵ Ti noatepae, Kótóné i fo erapó.
“Yata, yalo Naale betóo, ɛ mió naao Aya alée fóo, i dere ape.”
Me fo ipó.

“E, ama Alima betóo, a yało Naale betóo yaalopó,”
ere fo-a, mé *ensel*-paae yaleé?

⁶ Téró ai fo kaae, Kótóné ama topo naale betá i
haepaae dapesó wouraalu, i fo dapó.

“Kótóné *ensel*-rape fea a aqomó sukóló bitu, ama
doi betá hale sóró horótu betae,” erapó.

⁷ Tépatei, Talené ama *ensel*-rapemó tuę muturaalu,
i fo dapó.

“*Ensel*-rape ama fo erale fópóló, besę tiki alée
falóo, ama kutó diratere whırape simi alée
falóo dua dapó,” erapó.

⁸ Tépatei, kale Naalemamó tuę mutu i fo erapó.

“Kótóo, naao so whı teteróló kaae tare ala ke-
mekélé ini, hale yó tawóo, naao so whı
teteróló kaae tawaaire alakélé, mo donoi
alané kaae tawóo yaalopó.

⁹ Naao hosaa mo donoi alapaae muóo, dowi ala ya
mo hýyóo yalepó.

Atéyaleteiné, ya teteróló kaae tare Kótónétóró
ya mo taoró beteróturaalu, naao fulumu
whırape ti ya aqomó beterópóló, hai fane
wel wei naao topomó suniyóló, ya sóró
beteralepó,” erapó.

¹⁰ Tétu, ama i fokélé dapó.

“Tale-ó, mo take keké nale alimó bete kaayóló
fótuku mulóturaalu, haeró şatamo naao
naasenétóró alerapó.

¹¹ Ai aleyóló muló betere ęla feata, doyóló
aluyaalotei, ya ti hale betó tarapó.

Ai ęla ęla feata, deróló sókó fatere kuti
derakele yóló turukó fu dere kaae, doyóló
mo ti kemeyaalopó.

12 Whinė deró betere derakele kuti sokóló ó me ọla bopetu dere kaae, mió i ere saro haetamo naao bopée soro, kuti kisi kae derotu dere kaae, kisi saro haetamo aleyolo mulaalopo.

Téyaalotei, yata ai ere kaaetoro hale beto taru, bitiré faaire ba fo mo kemekélé yaalo meipo,” erapo.

13 Me fo i ape.

“Naao boe whirape fea yalo dolo tetorolo, naao ho aomo beteraaire be de sokó wopoló, ya yalo turu naase ero betere tikimo kaae tawolo betae,”

ere fo-a, Kotoné mé *ensel*-paae yalee?

14 Ti *ensel*-rape feata, Kotoné kuti diróturaalu, mo ti betaaire so whi tao sene fae yolo, doteyale keperape meie?

2

Wisiyolo kaae taru, kale fo wisi wosae ere fo

1 Térapa, da feané wosale mo bete mole fo keterolo, da kopaae faqsoro ai fo kutiri mulolo, mo hotowaro kaae tawaalopolo i dere ape.

2 Ti noatepae, mo take Talené ama fo so whipaae yo melale fae yolo, *ensel*-rapepaaepi melalepo. Me whinetamo ai fo tikitepa, o sya feni horatepa, ti ai whipaae dowi kwia mo donotoro motua yalepo.

3 Mio danekelétamo Talené doasi tao sere ala keterolo, hale ọla kaae aoratepa, ti dakélé netero hasoko faaloé? Ti ai doasi tao sere alata, Talené amatoro folosoro so whipaae yalepo. Ai fo wosale so whi atimanemo, mopolo dapaae diriyolo yo melalepo.

⁴ Ai wh̄irapené yó matere fo mopóló tué tiki tirópóló, atimané yó male fotamo touróló kótóné, me ala yaairemó eratere alarapekélé, kolóló sir- atere alarapekélé, kae kae kelemei alarapekélé fea eralepó. Atéturaalu, Kótóné ama kisipa mole ala sya fóló, D̄ei Kepe Wisiné h̄ale matere alakélé atimamó dok̄oróló mo s̄uralepó.

Yesu ą ama no nerape kaae alée fele fo

⁵ Take nalopaae d̄a bit̄i faalopóló i bopetu betere tikita, *ensel*-rapepaae t̄eteróló kaae tawae inipó.

⁶ Tépatei, Talené fo as̄ere tuamó wh̄i mené etei kaae fo erapó.

“Mo wh̄i-a, noa kaae doasi bete mupa ąpaae kisipa mutu betere?

Wh̄iné naalemakélé hosaa muóló kaae tare-a, ą noa doi mole wh̄i betepa de?

⁷⁻⁸ Naao ą i haemó beteralesukamó, *ensel*-rape aomó beterópóló yalepó.

Téyalet̄ei, doasi doi mole alaró, mo kae ere d̄e wisinaaletamo ąpaae eróló, ą sóró ho- ralepó.

Téturaalu, fea ala amatóró t̄eteróló kaae tawópóló, naaotei eralepó,” erapó.

Kótóné ai alarape fea ama t̄eteróló kaae tare aomó mulalet̄ei, mo bet̄akókélé h̄ale munipó. Atére ala mió d̄an̄e kelené kilinipó.

⁹ Tépatei, Yesupaae eró betere ala kisipa muae. Taketa, Talené *ensel*-rape aomó mo sawa sukamó beteralet̄ei, ama tikimó susupu sóró suk̄ale betené, mió Talené ą topo wh̄i beteróturaalu, doasi doi mutere alaró mo kae ere d̄e wisinaaletamo ąpaae eró betepa kelerapó. Aita, Kótóné

hamokoróló hãle tao sere ala ðapaae eróturaalu, sukutere ala ðapaae waqsóró, mo turó ama tikimótóró serapó.

¹⁰ Kótó ąta fea ala bete tale bitu, fea ọla ọlané ama kisipa mole alatóró erópóló, aleyóló muló beterapó. Atére sekéné ama mo dekéro betó mole naale senaale aluni, mo kae ere ðe tuapaae ąlisóro faaire whi Yesu ą mené dóló sukunópóló yalepó. ą atéro sekę siré fóló, asane feleteiné so whi tao saai mo sųre topo whi beterapó. Ti Kótóné ąpaae ai eró betere ala fea ðané kilituraalu, mo dono ala erapóló kisipa mutapó.

¹¹ Me alatamo hosekény, Talené ama kae beteró betere so whiró atima fokóló kae beteratere sekétamo, Kótóné mo betą faketóro aleró betereteiné Yesuné atimapaae no nerape-ó yaaire ą hale dumipó.

¹² Ama i fo dapó.

“Yalo no nerapené naao doi tuę yópóló, yalo hakeamó yóo, touró betere so whi feané keletómó naao doi sóro horóturaalu, wole fokélé yóo yaalopó,” erapó.

¹³ Me dere fo i ape.

“Yalo ąpaae tuę tiki tiraalopó,” erapó.
Ai fo kaae ama momó dapó.

“Ękélé, Kótóné ama ępaae melale naale senaalekélé, ða fea i betere ape,” erapó.

¹⁴ Ti Kótóné ąpaae kaae tawae yóló melale naale senaaleta, mo hae whitóro betereteiné, ąkélé atima daale mo tikitóro alée felepó. Aita hãle mei, sukutere fotokọ bete tale Satan ðoraai yalepó.

¹⁵ Tétu, sukaqsóró witere alané wae sóró dokóló muló betere so whì ą sukuturaalu, teraayóló hąle fópóló eralepó.

¹⁶ Ti ama ai ere doasi alata, *ensel*-rape tao saai ini, Abraham-né deté fele naale senaale tao saai yalepó.

¹⁷ Atére betené Yesu ą Talené ala eróturaalu, so whì kolené sukóló, tao sóró momaratero topo whì bitu, so whinė du betale dowi alamó, Kótóné atima kwia melaqsóró sesé yaairaalu, ą ama no nerapené daale tikitóro alée felepó.

¹⁸ Ti noatepae, sų sere alaró kae kae susupui alatamo siré fóló mo asareteiné, mepaae so whì dowi ala yópóló sų sere sukamó, atima dée naqsóro ama mo sųmó tao senérapó.

3

Yesuné Moses tẹteró beterapó ere fo

¹ Térapa, dowi ala fokóló kae beteró betere no nerape-ó, ąąkéle ąąkéle Kótóné hepen bepaae faai ape yóló mo betą kaae fotóro erapa, ąąné tuę tiki mo turó Yesupaaetóro muló betae. Ti ąta, Kótóné ama fo yó melópóló dotęyale whì betóo, ąámó momaratero topo whì betóo erapóló ąané i du betere ape.

² Moses-né Kótóné ama fake so whì mo wisiyóló kaae taru yale kaae, Yesunékélé ą sóró beterale sekéné ąpaae erae yale ala fea mo turó eraté fu betalepó.

³ Betą be tẹtere whinė be wisinaale tẹpa, so whinė ai be siratua dapó. Tépateti, ai be tẹyale whì dukiratero foné be wisinaale tẹnapóló, siratere

ala teteró betrapó. Atétu dere kaae, Yesuné doasi doi mole alané Moses-né doi muale ala, mo bosene falapó.

⁴ Be fea tēnetei ama kōleaané daani, whīné tēyóló mulótua erapó. Atére kaae, ọla ọla fea Kótóné amatóro aleyóló muló betrapó.

⁵ Ti Moses ọ Kótóné kutó diratere whī bitu, Talené so whī mó wisiyóló kaae taté fu bitipakalepó. Tétu, ama du betere alata, take nalopaae Talené mo eraalopóló, ama hakearóló yó mótu bitipakalepó.

⁶ Téyaletei, Keriso ọ Kótóné naalematóro bitu, Talené ama fake so whī fea mo hotowayóló kaae taté fu betrapó. Atétu, take nalo waaire be demó Talené dapaae wisi ala eraalopóló, haitamo kaae taru, halaainé ama ala hāle eró tapa, ti dā Kótóné ama fake so whītóro betrapóló kisipa muae.

Kisipa tirénire so whīpaae wisiyóló kaae tawae ere fo

⁷⁻⁸ Atéreteiné Dēi Kepe Wisiné i fo dapó.

“Whī bitini hāle kópu kaae fi tikimó, Kótóné diaa noutererape sū sóró kaae kelalemó, ama dere fo woseni, dowaae fóló hosaa tā ipakalepó.

Atéyale kaae, mió diaaokélé ama fotamo wosetepa, diāné hosaa tā yaqsóro yae.

⁹ Diaa noutererape atima atéro kuturaalu, 40 ba fo tuamó ẹ kaae kolóló sū siré fu betepa, yālo erótu betale ala atimané kilitu betalepó.

¹⁰ Atéyale betené ai alimó betale so whītamo fopaae butu, yālo i fo yalepó.

‘Atimané hosaa mo turó kae tikipaae muluraalu, yálo erótu betere ala mo tuékélé inipó,’

¹¹ Atétepa, ẹ fopaae butu etei dirii fo yóló mulalepó. ‘Yálo hosaa muni deyóló dua betere ala tuámó, atima sókókélé mo waalomeipó,’ ” erapó.

¹² No nerape-ó, diákó mepaae whiné hosaa tuámó mole dowi alaró, mo ti betere Kótópaae tué tiki tirénitere alatamo iru, Kótó taaróló faqsóró, hotowaró kaae tawae.

¹³ Téturaalu, miópó du betere be ẹ kemeyaa epatei, dowi alané diẹ dilikóló diaaọ hosaa ẹaraqsóró, betere dokọ diąsisi ketekẹ u bulótu i bulótu du betae.

¹⁴ Folosóró kaae suraalu, ẹané tué tiki tirale ala tuámó taaréni, mo diriyóló bitiré fóló, kemene fole kwiamó sókó fupa, ti Keriso tuámó mole ala ẹanékelé serapó.

¹⁵ Kótóné ai fo ereteiné ẹané u deté wale fo momó i dere ape.

“Whị bitini hẹle kópu kaae fi tikimó, diaaọ nouter-erapené Kótóné dere fo woseni, hosaa ẹayóló dowaae fu betale kaae, mió diákélé ama fo wosetepa, diaaọ hosaa ẹa yóló dowaae faqsóró yae.”

¹⁶ Talené atimapaee yale fo wosaalo hýyóló dowaae fele so whị-a, deé? Aita, Isip hae taaróló, Moses-né dapesó fele so whịtórótípó.

¹⁷ 40 ba fo tuámó, Kótóné fopaae bualetei-a, detamo maaté yaleé? Aita dowi ala yaletéiné kópu kaae fi tikimó, hẹle sisiraae fele so whịtórótípó.

¹⁸ Kótóné ama dirii malo duraalu, “Yalo hosaa muni deyóló dua betere tikimó, atima betakókélé mo sókó waalomeipó,” ere fo depaae maaté yaleé? Aita, ama fo tikitú betere so whípaaetóró erapó.

¹⁹ Ti atima Kótóné dua betere ala tuápaae sókó fenire beteta, Kótóné fo wosóló, tué tiki tiréni yaleteiné erapó.

4

Kótóné so whi sɔa nópóló tukóló muló betere be de mulapóló ere fo

¹ Ti Kótóné ama so whi sɔa nóló bitɔ wópólópó ere fo kemeni, hale mulapó. Atérapa, ai tuápaae bitɔ faairetei dɔ hɔsókó faqsóró, witamo hotowaró kaae tawae.

² Ti noatepae, mené atima Juda fake so whípaae yó melale fo wisi dapaaekélé yó melalepó. Atimané ai fo wosóta yaletei, mopóló tué tiki tiréni yale betené atima tuámó me dukélé olenipó.

³ Ti ai fo mopóló mió tué tiki tiró betere so whi dɔta, Kótóné ama sɔa nokole tikipaae sókó fu beterapó. Tépatei, kisipa tirénire so whípaae Kótóné i fo erapó.

“Atétepa, ɛ fopaae buturaalu, etei dirii fo yóló mulalepó. ‘Yalo sɔa nóló betere tikipaae atima wóló betókélé mo yaalomeipó,’ ” erapó.

Take Moses betale alimó Kótóné ai fo mo epatei, sɔaró haetamokélé, ere ɔla ɔlakélé, fea Kótóné ama aleyóló kemerélipakalepó.

⁴ Ti noatepae, wɛike be demó Kótó ɔ sɔa nale fo mepaae asɛ tuámó eretei dosɔatepa tuénérápó.

“Kótóné ama diyale kutó fea kemeróló, wɛike be demó ti ɔ sɔa nalepó,” erapó.

⁵ Kale yale fo momó i dapa, wosae.

“Atima yało şaa nóló betere tikipaae wóló betókélé mo yaalomeipó,” erapó.

⁶ Atére betené mió mepaae so whı şaa nóló betaalopóló, i bopetu betere tuamó sókó fóló betenérápó. Ti take betale so whı Talené fo wisi mené yó matepa wosetua yaleteti, ai fo aqmó sukóló bitini, tikitı betaletiné şaa nóló betere ala tuapaae sókó fenipó.

⁷ Atéró bitiré fóló, mepaae ba forape keme itikimó, ti Kótóné be de kae dale mulóló, miópó doi mulóturaalu so whıpaae i fo yae yóló, Depit-paae ipakalepó.

“Mió ama fotamo wosetepa, ti diaaq hosaa tayóló dowaae fu betaqsóró yae,” erapó.

⁸ Ti noatepae, Josuané Talené so whı şaa nalóló beteróluşsóró, ti nalo me be demó Kótóné şaa nóló betaalopó fo uameipó.

⁹ Atérené Kótóné ama kutó kemeróló ą şaa naleteita, take ama so whı şaa nóló beteraaire alamó kisipa mutu ereteiné, dią ai şaa nóló betere ala tuapaae biţi fenérápó.

¹⁰ Ti noatepae, Kótó ą ama kutó diyóló kemeróló, şaa nóló bitu yale kaae, mepaae so whı de Kótóné şaa nóló betere tikipaae sókó fupa, ti so whıkélé atimané ditere kutókélé taaróló, şaa nóló hale betenérápó.

¹¹ Atérapa, atima Kótóné fo tukóló dowaae fu betere ala sya furaalu, dąkélé dée naqsóró, ai şaa nóló betere tikipaae ketekę buóló sókó faalopa siépe.

¹² Ti Kótóné fota, beteró betere fotokqtamo faayóló mo şurapó. Ai fota, tamo fakeró fosó daale

bóe dele sepakené fosókélé mo teraae falapó. Atéru, whíné asoró kepetamo tuámó tekeyóló sonaae fóo, diri tamo olekereteikélé tuámó tekeyóló sonaae fóo, dua dapó. Atérené whíné hosaa tuámó ere alaró mole tué tikitamo, Kótóné ai fonétei kaae kolóló talenérápó.

¹³ Kótóné aleyóló muló betere ọla ọla fea ama keletómó hiró bitini, mo fopa haķeamó mulapó. Atére sekéné keletómó, ɖané du betere ala fea mo betakélé hiraalomeipo.

Yesuta Talepaae momaratere topo whị beterapó ere fo

¹⁴ ɖa tao sóró momarótu betere doasi topo whị Kótóné naalema Yesu ẹ sẹ tuámó fóló hepen-mó beterapa, ama fo wisi ɖané wosóló mopóló ẹpaae tué tiki tiratere ala taaréni, mo ti tiró betae.

¹⁵ Ti ɖata, mo hae whị betereteiné mepaae seķei ala ó dowi ala yópóló sụ supa, diriyóló daayaaire fotokọ mo bunipó. Tépateti, ɖamó momarótu betere topo whíné ai alarape fea ama hosaamó suraalu, ɖa tao senérápó. Ti mió ɖapaae i wou betere seķe ó dowi ala yópóló, sụ sere ala fea ẹpaaekélé wua yalepó. Téyaleteti, ẹ dowi ala mo betakélé inipó.

¹⁶ Atérapa, ɖapaae seķei ala wale sukamó ɖa kọleturaalu, ama tao sọpóló hamokoróló hẹle tao sere ala tẹteróló kaae tare tikipaae faaire wini, halaainé faalopa siépe.

5

¹ So whimó Talepaae momaratere topo whị sóró beteraai, whịrape fea fopeyóló betẹ whịtóró sóró

beterótua dapó. Ai whíta, so whíró Kótótamo tuámó bitu, so whiné yale dowi ala Kótóné tokóló alurópóló, simó sukúlaa dalatere alaró hãle matere alatamo dua dapó.

² Ti kóló kólóru, kópaae fole so whi dã tao saai ai tuã whi ăkélé hae whítóró ereteiné naameyóló mo dua bitu enérápó.

³ Ti ăkélé dowi ala dere whi beterapóló kisipa mutu, ama yale dowi alapi Talené wisirópóló, simó sukúlaa dalóo, nalo ti mo so whiné dowi ala wisirópóló sukúlaa dalóo, dua dapó.

⁴ Mepaae whi momatere topo whi betaai doi sere alata, ama kôleaané enénitei, Kótóné Eron-paae ape yóló momaratere topo whi sóró beterótu yale kaae, Kótónétóró ai whi sóró beteranérápó.

⁵ Atére kaae, Keriso ă doasi doi saai kisipa mutu, amatei momaratere topo whi bitinipó. Téní, Kótóné ăpaae duraalu,

“Yãta, yãlo naalepó. Ẽta, mió naao aya alée fulapó,” erapó.

⁶ Ai fo kaae, me asẽ tuámó i fo dapó.

“Melkisedek ă momaratere whi bitu deté fele ala naao tẽteróló kaae taru, momatere ala hãle yó taté fu beterópóló, yãlo yã sóró i beteratere ape,” erapó.

⁷ Yesu i haemó bitiré fele sukamó, ă sinaqsóró tao saaire seképaae me sukamó ă wole yóo, me sukamó ă tao sae yóló moma fakeyóló yóo dua yalepó. Ẽ atéro Tale aqmó sukóló betaleteiné ama erae yóló kematere moma Kótóné wosóló, mo eralepó.

⁸ Ti ă Kótóné naalema bitutei, sekę hăle beleté feleteiné Kótó aqómó sukóló betere ala mo asane felepó.

⁹ Ai ala deté fóló, ă momaraterere whı wisi bitı felepó. Atétu, ama fô wosóló eraterere so whı fea aluni, mo ti betó tanópóló, tao su betere bete tale alée felepó.

¹⁰ Ti aita hăle mei, Kótóné ăpaae duraalu, “Melkisedek-né deté fele ala tuamó yă momaterere whı beteratapó,” yale betené yalepó.

Talené ala taaróló sisópaae eratepa mo wió yae derefo

¹¹ I bopeyale alarape dekeró moletei diăpaae uamó, ai fo bete diaağ wosaaire hapólureteiné, diăpaae yaairekélé dirirapó.

¹² Ita mo fo dapó. Diă mo take kaae sóró Kótóné ama bete mole fo woseté waletiné, mió diă Kótóné fo yó materere whırape mo şumó bituapó. Até uătei, ama bete mole fo diă tué inipa, take kaae sóró yó malepaae fesaae fóló, mené diă momó yó manérápó. Diă dirii ęla naaire şuni, keteirape mo awátóró naai eķeletu dere kaae erapó.

¹³ Mepaae so whı de awátóró eķeļeyóló nuku betepa, ti ai so whı mo ketei kaae bitu, Kótóné mo donoi ala erateretei tuéni, kóló kólórapó.

¹⁴ Tépateti dirii ęlata, disire so whinė nópóló muló beterapó. Atére so whı ti Talené fo wosetere dokę fea ama alatóró eró tareteiné asa duraalu, dowi alaró wisi alatamo şumó kăae kolóló, tal-enérápó.

6

1-2 Atére betené Kerisoné ala i ape yóló, teómó kaae suraalu, yó matere fo momó kae yó melaalomeipó. Até yaleteti taaróló, mió mo dirii fo diãpaae i dapa wosae. Take kaae sóró yó melale fota, wh̃rapené be t̃eteróturaalu, folosóró iru eleké detu dere kaae yóló, yó male alarape i ape. Sukutere alapaae ălisóró fole dowi ala taaróló, t̃u wisipaae fole alakélé, Kótópaae tué tiki tiratere alakélé, w̃ei tópuratere alakélé, me wh̃i Talené kutó dirópóló, ama tikimó naase mulatere alakélé, sukutere so wh̃i kepaayóló betaaire alakélé, so wh̃i feané yale ala taleyóló mo ti muó tawaaire kwia melaalopó ere fokélé, take folosóró kaae suraalu yó maté waleteti, momó kae yó melaalomeipó.

3 Kótóné wisirapa, dirii fo yó melae depa, ti d̃ané mo yó menanérápó.

4-6 Mepaae so wh̃i atima diliki tuamó beteretei taaróló, d̃e tuãpaae bit̃i f̃óo, hepen bemó mole wisi wisi ăla atima sóró asa yóo, D̃ei Kepe Wisiné erótu betere alakélé atima sóo, Kótóné bete mole fo tuamó bole wisi ala atima kisipa yóo, take waaire alimó t̃eteróló kaae tawaaire fotok̃ok̃élé atimané tué yóló asa yóo ere so wh̃itei, Talené ala taaróló fupa, ti momó kae kisipa feteyóló fesaae wonénipó. Téturaalu, atima ai du betere alané Kótóné naalema so wh̃i feané keletómó doasi hale seróló, ă filipaa ni tómó momó oleratere aq̃rapó.

7 Hali wouraalu, wisi f̃e bulatere haemó ăla wisiyóló holóló, ai kutó talené ăla supa, ti ai hae tiki Kótóné wisiraalopó.

⁸ Tépatei, ɔla wisiyóló huni, mu daai képiró dowi netamo hotere hae ti fe buni, dowi deké bulapó dua dapó. Atére haeta, ai kutó talené doróló, kemeróturaalu simó néli biliyaalopó.

⁹ Dəné hosaa mole no nerape-ó, i deté wale fota, diə tuəmó ere alamó dumipó. Ti diəta, Talené ama so whi aluyaqsóro tao sale ala tuəmó betere ala dəné kisiparapó.

¹⁰ Ti Kótó ɔta, so whi feané du betere alarape hɔko taleyóló kwia mótumipó. Atérapa, diaaɔ ama kutó diratere alakélé, Kótó ɔpaae yaala sókó furaalu, ama kae beteró betere so whi tao sere alakélé, nalo tao siré faaire alakélé, fea ama tué yó taru, kwia mo donotóro melaalopó.

¹¹ Talené diə dokɔ feapaae melaalopó yale ɔla mo saasepólópa, ketekɔ buóló mió diaaɔ ai du betere alatóro həle yó taté fóló, kemene fole kwiamó sókó fae.

¹² Diə Kótóné ala erótu beteretei deka yóló taaréni, mepaae so whi atima tué tiki tiratere alaró sekei ala wapatei, həle yó tare alatamo su beterapó. Diəkélé ai ala yaasepóló, atimané dere alatóro sɔróló yae.

Kótóné eraalopó dere ala həsókó fəni mo eraalopó

¹³⁻¹⁴ Kótóné ama eraalopó yóló mulale fo Abraham-né mopó yópóló, Tale ɔ tɛteró betere Doasi me bitinipa, amatei ɔ doi yóló dirii malo duraalu,

“Yəlo yə wisiratereteiné, naao detere naalené deté fole naale senaalekélé doakale fake firatere ala həsókó fəni, mo yaalopó,” ipakalepó.

15 Atétepa, Abraham ă whaaliani, dua kaae taté fóló, nalo Kótóné ăpaae melaalopó yóló mulale ăla mo salepó.

16 Me whinė mepaae so whípaae i ala eraalopóló mulatere fo diriróturaalu, atimané doi yóló dirii malo dumi, atima teteró betere doasi whinė doi yóló, ó Talené doi yóló malo dua dapó. Atéró dirii malo dereteita hăle mei, nalomo ai fo inipóló foné u só derótu, i só derótu yaqsóro dapó.

17 Ti Kótóné ama eraalopó dere fo diriróturaalu, amatei ă doi yóló dirii malo yaleteita hăle meipó. Ama ai eratere ala saaire so whinė ama yóló mulatere fo kisipa feteyóló taaréni, mo dokonatapó kisipa muópóló yalepó.

18 Ti Kótóné ama eraalopó yóló mulale foró dirii malotamo epatei taaróló, ama kisipa feteyóló me kae ala eranénipó. Kótóné ai ala yaleteita hăle mei, ă dowi alamó kwia sóro aluyaqsóro, Talené tao sóro mo wisiyóló beteraalopó yale fo wosóló hosaa tuămó muló bitu, tuę tiki tiraté fu betere so whi ă keteke buópóló yalepó. Ai so whăta, ti ăătoró i ape.

19-20 Take nalo ă mo wisiyóló betaalopóló hăitu betere ala mepaae sekę ó whaalia dere alané só deróló doraqsóro, ai hăitere alané ă diriróló, turuku kaae derapó. Ai turukuta, hăko tikimó dini, satăle yóló kuti oleró betere tiki bosenóló, Kótóné mo kae aleyóló muló betere be ke tuămó erapó. Ai be ke tuăpaae so whi nalo wópóló, ă tao sere whi Yesu ăpi folosóro sóro falapó. Ai sekęta, Melkisedek betale kaae, so whimó momaratere topo whi alée fóló, ai ala hăle deté fu beterapó.

7

Melkisedek momaratere topo whi betere fo

¹ Ti Melkisedek ata, Salem be hulua teteróló kaae tare topo whi betóo, mo taoró betere Kótópaae momaratere whikélé betóo, ipakalepó. Abraham a mepaae topo whirapetamo bóe fóló, bóe whirape dóló kemeróló momó fesaae wouraalu, tumó Melkisedek-tamo hokolaa yóló, Abraham wisiraterere fo erapó.

² Atétepa, Abraham-né ama bóe dóló sale ɔla ɔla naase tamo moletei dekeyóló, betá Melkisedek-mó melalepó. Melkisedek-né doi bete tamo mulapó. Folosóró doiné bete, “Donoi ala dere topo whipó,” Me doi bete, “Salem be hulua teteróló kaae tare topo whipó,” Ai doi feteyóló, “Hosaa muni deyóló dua betere ala teteróló kaae tare topo whipó,” erapó.

³ A deyale soró whitamóné doikélé, a kaayale noutererapéné doikélé, a deyale be dekélé, sukále be dekélé, asemó muni, Kótóné naalema biture kaae, a so whimó momaratere topo whi hale betó tarapó.

⁴ Ai seké a doasi whipóló ere ala tué muae. Dané noutere Abraham-nékélé ama bóe dóló sóró wale naase tamo ɔla ɔla dekeyóló betá Melkisedek meló beterapó.

⁵ Kótóné ama tukóló muló betere fo tuamó i ala yae erapó. Lipai fake whirapekó so whimó momarópóló sóró beteró betere whirapéné mo so whiné mole naase tamo ɔla ɔla dekeyóló, betá siré kweyae yóló munélipakalepó. Ti atéro kotere whirapekélé, matere so whikélé, atima

fea Abraham-né deté fele fake no nerape epatei, atima tuamókélé siré kweipakalepó.

⁶ Melkisedek-ta, Lipainé deale whi meitei, Abraham-né naasetamo ɔla ɔla dekeyóló betá ɔ melalepó. Ata, Kótóné wisi ala eraalopó yóló mulale whitei, ai ɔla ɔla matepa sale seké Melkisedek-né ama foné ɔ wisiralepó.

⁷ Ita mo dua dere alapó. Doasi whiné ɔ aomó betere whi ama foné wisirótua dapó.

⁸ Atétere kaae, so whiné naase tamo ɔla ɔla dekeyóló betá siré fu betepatei, ai whirape suku-tua yalepó. Atéyaletai, kale doasi whi Melkisedek-né naase tamo ɔla dekeyóló betá ama saletai, ɔ sukalepó fo munipó.

⁹ Mené etei kaae fo sumó enérápó. Naase tamo ɔla ɔla moletei, betá dekeyóló siré kotere whi Lipai ɔ Abraham tuamó, ni du ke kaae bolepo. Atépa, Abraham-né ɔla ɔla dekeyóló betá Melkisedek-mó matepa, Lipainé amakélé meló beterapó.

¹⁰ Ti Melkisedek-ró Abraham-tamo hokolaa yaletaita, Lipai ɔ deyaai ama tikimó teó bupa yalepó.

Melkisedek momaratere whi betale kaae, Yesukélé momaratere whi betó tarapó

¹¹ Lipainé deale whirape mo so whimó momatere topo whi betere tuamó Kótóné tukóló muló betere fo sókó walepó. Tétu, atima ai alimó momarótu betale alané Kótóné so whi mo ti wisiróluasóro, momaratere topo whi me kae waalopó fo uameipó. Ti ai momaratere topo whita, Eron-né deale naalené deté fele whi mei, Melkisedek bitu yale kaae du betaalopó, erapó.

12 Ti noatepae, mo so whimó Talepaae momaraterere whirapené du betere ala taaróló, Talené me kae alatamo tukóló mulatepa, ti ai ala sumó enérápó. Meitepa, ti enénipó.

13 Ai ere fo dokonó betere whita, Lipai fake mei, kae fake whipó. Ai fake mo betanékélé so whimó Talepaae simó sukulaa dalóló, momatere ala inipó.

14 Dá teteróló kaae tare whi Yesu ă Juda fakené dealepóló, so whi feané kisiparapó. Ti betă Juda fake whikó so whimó momaraterere topo whi be-taalopóló Moses-né asēmó inipó.

15 Melkisedek betale sirimó, whi me kaetamo sókó hotepa, ti dāné i deté wou betere fo bete mo hăkearatapó.

16 Ti noatepae, ai whi ă so whimó Talepaae momaraterere topo whi sóró beteraleteita, Lipainé deté fele whirape maaté sóró beteranérápó, ere fo sya furaalu inipó. Ai seké ă tuamó doasi fotokô bulu, mo ti betó tareteiné dóló sukunaaire sunipa, Talené ă momaraterere topo whi sóró beteralepó.

17 Ti ai fo kaae me asê tuamó i fo erapó.

“Yăta, momaraterere topo whi Melkisedek-né du betale ala naao teteróló kaae taru, yó taté fu beterópóló, yălo yă sóró beteratapó,” erapó.

18 Kale folosóró yóló mulale fota, me ala yaaire suni bēpa, hăle ăla kaae aqróló taalatapó.

19 Ti noatepae, kale tukóló muló betere foné so whiró Kótótamo betāmó wisiyóló beterópóló, mo turó wisiranénipó. Kale folosóró yale ala taaróló, mió Talené ama so whi wisiyóló beteraalopó ere foné betă Kótó betere felekepaae ălisóró fenérápó.

20 Ti ą momatere whi s3ró beter3turaalu, dirii malo y3l3 s3ró beteralep3. T3yaletei, mepaae momaratere whirapeta, hale fon3 maaté s3ró beter3tua dap3.

21 T3yaletei, K3t3né i sek3 momaratere whi s3ró beter3turaalu, ąpaae i malo yalep3.

“Talen3 ama kisipa feteyaalomei, ya so whim3 momaratere whi mo ti bet3 tan3p3l3, ąalo ya s3ró beteratap3,” erap3.

22 Ti at3r3 dirii malo yaletein3 Yesu ą K3t3né ama so whi tao saalop3l3, y3l3 mulale fo diriraterete al3e felep3. Ama so whi tao saalop3l3 kisi y3l3 mulale fon3 folos3r3 yale fo teraae falap3.

23 Ti mo so whim3 momaratere whirape dek3r3 bitir3 waletei, ai whi sukutepa, me whin3mo t3ter3l3 kaae tatua yalem3, ai whirapek3l3 fea sukutua yalep3.

24 T3yaletei, Yesu ą mo ti bet3 taretein3, so whim3 momar3tu betere ala hale y3 tat3 fu beterap3.

25 At3ren3 K3t3tamo betam3 betaai kisipa mutu, Yesun3 ama yale ala tuam3 fu betere so whi mo ti beter3p3l3, Yesun3 ama mo sum3 tao sen3rap3. Ti noatepae, ąta so whir3 K3t3tamo tuą whi bitu, K3t3paae atima tao sae dere fo hale y3t3r3 tarap3.

26 Yesu ą at3r3, momaratere topo whi bitu, da ąayąare ala fea ama mo sum3 tao s3ró eran3rap3. Ti ąta, K3t3né mo kae beter3 beteretein3 men3 ą s3 deraaire bete muni y33, ą me dowi alatamo hosek3ni y33, dowi ala du betere so whitam3 betam3 bitini, kae bet33, 3 sar3 hepen betamok3l3 fea amat3r3 t3ter3l3 kae taw33 erap3.

²⁷ Mepaae momaratere topo whĩrape betere dokọ fea atimané dowi alapi kemerópóló, *sipsip* o *bulmakau* hupu simó sukũlaa daróló, nalo ti mo so whĩné dowi alamó sukũlaa dalatere ala suka fea hãle yó taté fu beterapó. Atima ai dere ala kaae, ẹ tuámó me noa dowi alakó mupa atéyaaloé? Ti ama betere bete Kótópaae mo betẹ félímótóró melóló, mo so whĩné dowi ala kwia ama tokóló aluróló wisiralepó.

²⁸ Ti kale tukóló muló betere fo sya furaalu, mo hae whĩtei, momaratere topo whĩ sóró beterótua yalepó. Téyaleteti, nalo sókó wale dirii malo fo tuámó ti Talené naalema momaratere topo whĩ sóró beteralepó. Ai whĩ ẹta, me alakélé mo yẹyẹni, so whĩ tao sere alatóró hãle yó tanópóló, Kótóné ẹ mo turó sũróló beteralepó.

8

Yesuta momaratere topo whĩ bitu, mió kisi ere fo diriró betere Talepó

¹ Dẹné i deté wou betere fo tuámó bete mole mo topo fo i ape. Dẹ tao sóró momaratere etei kaae topo whĩta, hepen bemó Doasiné tẹteróló kaae tare tikimó, ama turu naase eró betere dẹmó fóló betalepó.

² Take kaae sóró tẹyale momatere kuti bemó, Talené ama kae ere ala erótu beterapó. Ai beta, mo whĩné naasené tẹni, Talené amatóró tẹnapó.

³ Ti mepaae mo so whĩmó momaratere topo whĩrapené Talepaae hãle matere alaró simó sukũlaa dalatere alatamo yópóló, Talené sóró beterótua dapó. Atétere kaae, mió dẹ tao sóró

momarótu betere sekékélé, Kótó beterepaae hãle faalomei, me ɔla sóró ti sũmó fenérapó.

⁴ Aţamo i haemó bituʔsóró, ti so whĩmó momaraterere whĩ bituʔameipó. Ti noatepae, Kótóné tukóló muló betere foné Talepaae hãle melae ere fo sya furaalu, mótua dere whĩrape sóró beteró beterapó.

⁵ Ai whĩrape atimata, ó hepen-mó ere mo ti momaterere be sũróló, i haemó tẽne mo kuti bemó Talené ala erótu beterapó. Moses-né ai momaterere kuti be tẽyaaitepa, Talené ʔapaae i ma fo erapó.

“Naao ai be tẽturaalu hoko tẽni, dãmó hasi fosómó bitu, ʔalo ʔapaae yó melale be sũtóró mo hotowaró tẽyae,” yóló ipakalepó.

⁶ Téyaleteti, Talené ama so whĩ tao saalopóló, yóló mulale dirii fo Yesu ʔ tuámó erótu beterapó. Atére kaae, i haemó mepaae momaterere whĩrapenékélé ai ala du beterapó. Tépateti, mió kisi yóló mulale dirii foné take yóló mulale fo teraae falapó. Atére kaae, Yesuné Kótóné so whĩ tao sóró ditu betere kutóné atimané ditu betale kutó mo teraae falapó. Ti ai kisi dirii fo tuámóta, Kótóné ama so whĩpaae eraalopóló, mulale wisi ala ʔaanuraalu, take yale ala mo hãle ɔla ʔoró beterapó.

⁷ Ti noatepae, Talené take folosóró yale dirii fotamo mo sũrapó uʔsóró, ti nalo ama eraaire me dirii fo kae uʔameipó.

⁸ Tépateti, Kótóné ama so whĩ fopeyalemó, mepaae hʔsókó fole ala kolóló i fo yalepó.

“Êta, Talené i dapa wosae. Take waaire ba fomó Israel so whĩró Juda so whĩtamo ʔalo tao saai, kisi dirii fo kae yóló mulaalopóló diʔapaae i dere ape.

- ⁹ Ti mió yalo kae yóló mulaaire kisi dirii fota, take atimané noumatererape Isip hae kwiamó betepa, yalo dapesó wale sukamó, yóló mulale dirii fo kaae meipó. Atimané yalo yóló mulale fo sya fóló eró tanitepa, yalo atima tao saai yaleteti taaróló, sisópaae eralepó.
- ¹⁰ Eta, Talené i dapa wosae. Ai ala yóló kīlipaae Israel so whītamo yalo etei dirii fo yóló mulaalopó. Yalo tukóló mulatere fo tikaqsóró, atimané tué tiki tuamó mulóo, hosaa tuamókélé aseýóo yaalopó. Téturaalu, ę atima tēteróló kaae tare Kótó betóo, atima ti yalo so whī betóo yaalopó.
- ¹¹ Atétere alimó, me whīné ama be whī so whīpaae ó ama nomapaae duraalu, ‘Tale tué muóló betae’ dere fo momó kae yaalomeipó. Ti noatepae, ai be demó mepaae sókó deyóló betere so whīnékélé, doasi doi mole so whīnékélé ę mó tué yaalopó.
- ¹² Atétepa, yalo kōleturaalu, atimané du betere sonaalei alaró mepaae dowi alatamomó, kwia melaai yaleteti yalo kisipa keteróló aluraalopó,” erapó.
- ¹³ Ti Talené ama i yóló mulaaire dirii fota, “Kisipó” doi mulóturaalu, take folosóró yóló mulale dirii fo bete muni hale ęla kaae aępa, kisi foné mió mo felekemó kemeróló aluraai dapó.

9

I haemó kapala tēne kuti bemó momatu betere ala

¹ Take folosóró diaaę noutererapepaae Talené ama ala eróturaalu, ępaae momatere alakélé etéró

yae yóló yó melóo, ama ala eraaire momatere bekélé etéró tẹyae yóló yó melóo, ipakalepó.

² Atétepa, so whíné Talepaae moma yaairaalu, kuti be tẹyóló, u tuámó be ke tamo aleyóló munélipakalepó. Folosóró sókó fole be ke ti arai kutiné satale erepó. Ai be kemó ti *lamp* sà daalóo, ọla mulatere ni fakeró Talené keletómó mulótua dere *bred* otamo muóo erepó. Ai be kené doita, Kótómó kae tukóló muló betere tikipó.

³ Me aleyóló muló betere be keta, hapólui kutiné satale erepó. Ai be kené doita, Kótóné ama ala betà eraai mo kae tukóló muló betere tikipó.

⁴ Ai be ke tuámó felé kẹlaa wale fetera kaae ọla biliyaaire tiki *kold kapané* aleyóló daalóo, Kótóné ama so whípaae wisi ala eraalopóló ere dirii fo aseyóló buló betere *bokis-kélé* mulóo erepó. Ai *bokis* husiróló *kold kapa* datekàró beteraipó. Ai *bokis* dolomó, *kold kapané* aleale wutimó *mana* o deróló mulóo, Eron-né dotó tiki asẹ sokoretei mulóo, Kótóné dirii fo asẹre kane fake tamokélé bulóo erepó.

⁵ Ai *bokis* tómó, Kótóné ama mo kae ere de fàane *serupim ensel*-rape sùróló aleale ọla me uté daayóo, me ité daayóo erepó. Ai *serupim ensel*-tamoné baase dorokó faróló so whíné dowi ala kemeràleta dere tiki husiró beterepó. Atére alarape fea bete etérapóló, mió mo turó dāné enénipó.

⁶ I bope yale ọla ọla fea atéró taleyóló muló betepa, mo so whímó Talepaae momaratere whìrape folosóró ere be kemó, atimané ditere kutó diyaai, hutua yalepó.

⁷ Tétua yaleteti, mo u tuámó ere be kepaae ti so whímó Talepaae momaratere doasi topo whì ẹ

maaté betā ba fomó, mo betā félitóro fua yalepó. Téturaalu, ai be kepaae naase hāle feni, *bulmakau*-ró *meme* hupu sameatamotóro sóro fua yalepó. Atétua yaleteita, Talené atima kwia melaqsóro seséturaalu, ama yale dowi alapi Talepaae melóo, nalo ti mo so whinė dowi alapóló tuēni, mo ala nisyóló du betale dowi alamó melóo, dua ipakalepó.

⁸ Mió ai be hāle tēpa, Kótóné mo kae ala ere be tuāpaae sókó faaire tū hāle ai kinapa kelae yóló, so whīpaae Dēi Kepe Wisiné hākearóló yó mótu beterapó.

⁹ Ti take Talepaae me ọla hāle matere alaró hupu simó sukūlaa dalatere alatamoné ai ọla sóro wale so whinė hosaa tuāmó mole sekēi ala mo ti wisiranénire ala mió i alimó betere so whinė tuē yópóló, hākearóló yó matapó.

¹⁰ Atéró, ọla nokole alakélé, wēi nokole alakélé, Kótóné wisirapó yópóló, kae kae ala yóló wēiné fokutu betere alakélé feata, mo tó tiki maaté wisiróturaalu du beterapó. Talené ama dā tēteróló kaae tawaaire kisi alané tó tiki maaté wisiróló ai du betere alarape fea mo ti kemeraalopó.

Yesu Kerisoné samea sunée farale ala

¹¹ Mió dāpaae i eró betere wisi alarape eraai, Keriso ą so whimó Talepaae momaratere topo whi bitī furaalu, folosóro ą doasi momatere kuti be wisimó buó dealepó. Ai beta, i haemó mo whinė naasenékélé ó mepaae ọla ọla aleale sukamókélé tēni, mo taketi Tale ą betere tikimó hāle tēne bepó.

¹² Keriso ą Kótóné ai kae tukóló muló betere tikipaae sókó faairaalu, *meme* ó *bulmakau* hupu

malené samea sóró feni, suka fea mo ti muó tanópóló, ama samea mo betá félimótóró melóló, ą ai be tuąpaae sókó felepó. Tétu, so whı fea dowi alané dokóló mupa, ai sameané teraayóló mo ti betó tanópóló dupuró beteraó.

¹³ Mepaae whı dené Kótóné yaqse yóló mole fo tukóló, nalo ama ala eraai momatere bepaae faqsóró doasi fo mulapó. Atérené *meme ó bulmakau* wą hupu sameané *ó bulmakau* so utų hupu simó biliyale fapo terepeyóló, ai yale alapi kemeranérapó. Atéró, nalo ti Talené ala eratepa fo muni, mo sumó eranérapó. Ti ai alarape feata, hąle tó tiki maaté fukuturaalu dapó.

¹⁴ Téyaletei, ai du betale alarape bosenóló, mo ti betere Dęi Kepe Wisiné Keriso ą fotokąratepa, me alakélé munire betere bete wisinaale Kótópaae hąle melalepó. Dąné hosaa tuąmó mole dowi alané sukutere alapaae ąlisóró fu betepa, Kerisoné ama sameané sumó kemeranérapó. Atére beteta, mo ti betere Kótóné ama ala dąné erópóló yalepó.

¹⁵ Keriso ą atéyale betené Kótóné so whı tao saalopóló, kisi yóló mulale dirii fo eraaire tuą whı alée felepó. Aita hąle mei, Kótóné ą beterepaae ape yale so whıné ama eraalopóló mulale mo ti muó tawaaire ąla wisi sópóló yalepó. ą atéró sukąle alata, folosóró ere dirii fo aqmó bitu, dowi ala du betale so whı dokóló moletei, teraayóló hąle fópóló, dupurótu erapó.

¹⁶ Me whı ą sukuturaalu, ama mómu ąla taleyóló sae yóló mulatere fo kisipa muae. Ai whı ą sukuni hąle betepatei, ama ąla ąla hapale taleyóló sumipó. ą sukutepa, nalo ti ama yóló mulale fotóró sya

fóló senérapó.

¹⁷ Ti noatepae, kale whiné ama yóló mulatere fo sya furaalu, ʔ sukuni hʔle betepa, ama ʔla ʔla taleyóló saalomeitei, ʔ sinitepa ti senérapó.

¹⁸ Atétu dere kaae, Kótóné ama so whi tao saalopóló folosóro ere dirii fota, *sipsip ó bulmakau* hupu samea sókó faraletéiné diriralepó.

¹⁹⁻²⁰ Kótóné yae yale fo fea Moses-né mo so whipaae yóló kemetepa, i ala yalepó. *Bulmakau* hupu malené samearó mo wéitamó belere tikipaae fóló, mo sonaare *sipsip* hupu nikiró *hisop* ni teteitamomó tópuró sóro asere sókumókélé so whiné tikimókélé, apuralepó. Ai ala yóló kemetepa, i fo yalepó.

“Ita, Kótóné ama tukóló muló betere dirii fo sya fóló, eró tawae yóló diriróturaalu, eratere samea i ape,” yalepó.

²¹ Ai ala kaae, Talepaae momayaairaaalu tene kuti bemókélé, ai be tuamó Talené ala eraai mole ʔla ʔlamókélé, Moses-né ai samea sóro apurótua ipakalepó.

²² Ita, mo dere alapó. Kótóné tukóló muló betere foné fea ʔla fea Talené ama ʔlapóló dʔle mulóturaalu, sameané betʔ fokonérapó. Samea sókó farénitepa, ti dowi ala tokóló aluranénipó.

²³ Hepen bemó ere ala sʔróló, i haemó aleale mo ʔla ʔla Talené amapóló dʔle mulóturaalu, samea dilótua yaletéi mo donorapó. Tépatéi, hepen bemó mole mo alarape fokaaí, ti i haemó mole ʔla bosene fale ʔla wisinaalené sʔmó fokonérapó.

²⁴ Ti Keriso ʔ sukóló kepaayóló furaalu, hepen be sʔróló i haemó mo whiné tʔyale bepaae sókó

feni, mo hepen bepaaetóró sókó felepó. Atéro fóló, Kótó betere felekemó bitu, mió ă dă so whĭ tao sere tuă whĭ beterapó.

²⁵ Kale momatere be teteróló kaae tare topo whĭta, whĭné teyóló ama kae tukóló muló betere be tuăpaae ba fo dokô mo betă féli furaalu, ama samea sóró feni, hupuné samea sóró fua dapó. Ai whĭrapené dere kaae, Keriso ă hepen-paae momó fu, momó fu ini, mo betă félimótóró ama tiki Talepaae hăle melóló, sókó felepó.

²⁶ Keriso ă hepen bepaae dekéro félimó fuăşóró, ti i haemó ere ăla ăla fea keké nale alimó kaae sóró, sekeĭ ala dekéro félimó beleté fu bituăpó. Ténĭ, i kemetere alimó ă Kótó beterepaae mo betă félitóró sókó fóló, dowi ala mo ti kemeróturaalu, ama betere bete Talepaae hăle malepó.

²⁷ Dă so whĭta, Talené ere fo dokonóturaalu, bitiré fóló betă fapotóró sukutua dapó. Atéro sukăle kĭlipaae, ti dăné yale ala Talené taleyaalopó.

²⁸ Dă betă féli sukutere kaae, so whĭ feané dowi ala tokóló aluraai, Kerisoné ama betere bete Talepaae mo betă félimótóró melalepó. Atéro mió ă momó waaireteita, dowi ala tokóló aluraai waalomeitei, ă wópóló kaae tawóló betere so whĭ tao sóró mo ti wisiyóló beteraai dapesene waalopó.

10

So whĭné dowi alamó Yesuné betere bete mo betă félitóró male ala

¹ Kótóné tukóló muló betere fota, mo ti muaaire ala mei, take nalo waaire wisi wisi alané aso

maaté erapó. Atére betené kale tukóló mole fo sya furaalu, ba fo dokọ hupu dóló moma yó tare alané Kótó betere felekemó bitị faaire so whịné sekẹi ala mo ti wisiranénipó.

² Ai alanétamo so whịné hosaa tuámó mole kisipa tiki fea mo betạ félitóró wisiróluasóró, ti atima etei kaae dowi ala yalepóló, atimatei Talepaae momaraterere ala dekéro yó ta uameipó. Ti noatepae, atima etei kaae dowi ala yalepó tuẹ muameipó.

³ Atérené ba fo dokọmó hupu dóló momaterere ala hẹle deté fu betere kilitu, dowi ala kemeni, atima tuámó hẹle mulapóló hẹkearóló yó matapó.

⁴ Ti noatepae, wạ *bulmakau* ó *meme* hupu sameané dowi ala tokóló mo aluranénipó.

⁵ Atérené Keriso ọ i haepaae wóló i fo yalepó.
“Hupu dóló momaterere alaró hẹle materere alatamo naao hẹkese inipa, naaotei ẹ mo whịné tiki daaróló beteralepó.

⁶ Simó sukụlaa daróló momaterere alaró dowi alamó Talepaae hẹle materere alatamo kilituraalu, naao kisipa felénipó.

⁷ Atétepa yọlo duraalu, ‘Ẹ tẹteróló kaae tare Kótóo, kale bopeyóló mole asẹ tuámó ere fo mo dokonóturaalu, naao kisipa mole ala eraai ẹ wóló i betere ape,’ ” erapó.

⁸ Folosóró ama duraalu,
“Kótóné tukóló muló betere foné i ala yae yóló mupatei, hupu dóló simó sukụlaa dalaterere alaró Talepaae materere alatamokélé, dowi alamó materere alakélé, fea naao kolóló hẹkesenipó,” erapó.

⁹ Ai alarape yale sisópaae ama duraalu,

“Naao kisipa mole ala eraairaalu, ẹ i wale ape,”
yalepó.

Atéró, folosóró hupu dóló du betale alarape tokóló
taae faróló, ai sirimó ẹ sukale ala mo ti yó tanópóló
eralepó.

¹⁰ Yesu Kerisoné ama tiki Talepaae mo betẹ féliteóró
hale melóló sukaleteiné, Talené ama kisipa mole
alatóró sya furaalu, da ama so whípóló mo kae
beteralepó.

¹¹ Be dẹtere dokọ fea momatere be kaae tare
whirapené Talepaae hupu dóló momaratere ala
hale yó tarapó. Atétere alané dowi ala mo ti tokóló
aluranénipó.

¹² Tépatéi, mió i bopetu betere momaratere
doasi topo whi Yesuné dané dowi ala tokóló alu-
raairaalu, ama betere bete Talepaae mo betẹ
féliteóró hale malepó. Atéyale kilipaae ẹ ama alima
Kótóné turu naase eró betere tikimó fóló betalepó.

¹³ Ai alarape kemeróló, mió ẹtamo bóe du betere
whi fea ama tẹteróló só deraaire ala betẹ Kótónétei
erópóló, kaae tawóló beterapó.

¹⁴ Ti noatepae, mo betẹ félimótóró ẹ sukutu-
raalu, Talepaae ama hale male alané wisiróló, mo
kae so whi betó tanópóló yalepó.

¹⁵⁻¹⁶ Dẹi Kepe Wisinékélé Talené ai ere ala
dapaae yó móturaalu, folosóró i fo dapó.

“Ai alarape yóló kilipaae yalo atima tao saairaalu,
yóló mulatere diri fo i ape.

Yalo tukóló muló betere forape atima hosaa
tuamó mulóo, atima kisipa keteni tuẹ yó
tanópóló yalotei eróo yaalopóló,” Talené er-
apó.

17 Ai fo tómó me beleróló duraalu,

“So whị Kótóné fo aqómó bitini, atima kisipa mole
ala maaté sya fu betere alaró mepaae dowi
alatomómó kwia meni, yalo aluróló kisipa
keteraalopó,” erapó.

18 Ai dowi alarape feata, Talené mo ti kemeró
beterapa, hupu dóló Talepaae matere ala momó
kae hāle noatepa yaaloé?

Talené ala taaréni, hāle eró tawae ere fo

19 Térapa, no nerape-ó, dāpaae Yesuné ama
samea sókó faló betereteiné Kótóné mo kae ere be
tuāpaae faaire wini, mo halaainé sókó fenérapó.

20 Taketa, ai be ke satale yóló oleró betere
kuti tuāmó sókó fua yalepó. Mió Yesu sukóló ą
mo ti betere bete matere kisi tų alée faleteiné ą
tuāmótóró sókó fenérapó.

21-22 Ai ala maaté mei, Kótóné fake so whị tao
sóró, momaratere doasi topo whịkélé beterapa, dā
āpaae tuę tiki tiróló bitu, hosaa tuāmó hāıtamo
Kótó betere felekepaae fenérapó. Atéturaalu, dāné
i dowi ala yalepóló hosaa tuāmó sekei kisipa
muteretei ama sameané fokóló feléróo, dāné
tikikélé mo kikisi weinė fokóo, ereteiné mo ha-
laainé fenérapó.

23 Ti noatepae, Kótó ąta, dā so whịpaae eraalopó
dere wisi ala hāsókó fóló taaréni, mo eraalopóló
dāné so whịpaae du beteretei taaróló haepaae
derepaalomei, hāıtamo yó tawaalopa sae.

24 Dāné no nepaae yaala sókó fole alaró wisi
alatamo fakeyópóló, keteke u bulótu i bulótu dere
alatamo netéró yaaloé yóló, tuę teketu betae.

²⁵ Mepaae so whi atima Keriso fake tourótua dere tikipaae wale hótú dere kaae, dā momókó yaqse. Tēni, Talené dā dape saaire be dē felekemó walapa, betere dokō ama ala erateretei taarēni, ketekē u bulótu i bulótu dere ala mo ti fakeróló deté fu bitiépe.

²⁶ I bete mole mo fo dāné wosóló tuérutei dowāae fóló, dowi alatamo hāle yó tapa, ti ai ala kemerópóló Talepaae melaaire ọla me kae munipó.

²⁷ Kótótamo atéro bóe duraalu, du betere dowi ala hāle yó tapa, Talené fo tokótamo yóló só de-raaitere alaró ai whirape dalaaire sitamo kolóló, mo wió yae.

²⁸ Take mepaae whiné Moses-né asẹyóló muló betere fo tukóló yale ala, tamo ó sore whiné kolóló mopó depa, ti ai whi kọletere ala ini, mo ti sinópóló dua ipakalepó.

²⁹ Mepaae so whi dené Kótóné naalema belei ọla kaae aqróló tẹiya tẹiya yóo, Talené ama fo dirirale sameané fokóló kae beteró betepatei, ai samea hāle ọla kaae aqróo, Talené ai whi hāle hamokoróló tao supatei, ai ala erótu betere Kepe Wisi faleyóo depa, ti atétere whi ẹ kwia saairetei h̄sókó faalopóló de? Ti folosóró Moses-né yale fo tikitepa, dowi kwia mo salepó. Atéyaletei, mió ai alarape dere whiné saaire kwiata, folosóró sale kwia bosenóló mo doasi saalopó.

³⁰ Ti noatepae,

“Kwia tokó matere ala h̄sókó feni, mo ẏalotei yaalopó,” yale sekéta, dāné kisiparapó.
Me fo i ape.

“Talené so whiné du betere ala mo amatóró taleyaalopó,” erapó.

³¹ Mo ti betere Kótóné naase tuapaae foleteita, wi alapa mo wió yae.

³² Diāta, mo take bitiré wale sukamó, Kótóné fo woseté waleteiné diā tuamó deyo falapó. Atéremó, diāpaae kae kae sekei ala wapatei, diā wiyóló botokó feni, mo diriyóló betale ala kisipa muae.

³³ Ai maaté mei, me sukamó diā so whi feané keletómó sóró daalóló, susupui alaró haleratere alatamo eróo, me sukamó diā sere seke kaae, diaaḡ no nerapepaaekélé eratepa, diākéle atimatamo betamó titiyóló daalu beleyóo, dua yalepó.

³⁴ Atére kaae, atimané diaaḡ ne norape *dipula* beteratepa, kōle duraalu, atima tao sua yalepó. Atimané diaaḡ mole ḡlakélé fasó supa, mo ti muó tawaaire ḡla wisinaale saai dapóló haḡturaalu, atima sḡpóló taalatua yalepó.

³⁵ Térapa, ai ala deté furaalu, diaaḡ kisipa tiki tiró beteretei haḡle ḡla kaae taae faréni, mo hotowaró tao tawae. Atétepa, ti mo dupu wisinaale saalo ai ape.

³⁶ Kótóné ama kisipa mole alatamo eratepa, ti ama diāmó melaai dapóló bopere ḡla saasepólópa, diāné kisipa tiki tiróló, diaaḡ du betere alatóró haḡle yó tanérapó.

³⁷ Ti noatepae, Talené i fo erapó.

“Mo haḡleke sukamó waalopó ere seké ḡ waaitere be de ḡiliki faréni, ai be deḡmótóró mo waalopó.

³⁸ Téyaalotei, yaḡlo donoi alatóró erótu betere whiḡa, ti kisipa tiki tiratere alanétóró betaalopó.

Ama kisipa tiró betere ala momó wotąale depa, ti ai whıtamo yało kisipa felé yaalo meipó,” erapó.

³⁹ Tépatei, dą atei kaae wotąale yóló aluyaaire so whıtamo touyóló bitini, ąpaae kisipa tiki tiró betepa, dą aluyaąsóró Kótóné tao serapó.

11

Kisipa tiratere alané mo betenérapó

¹ Tué tiki tiróló betere so whıné nalopaae yaaire wisi ala mió kilinitei, take mo kelaalopóló diriyóló kisiparuraalu, haıtu beterapó.

² Mo take betale so whıné atei ala deremó, Kótóné mo wisirapóló atima dukiró beterapó.

³ Kótóné i ala yó fae depa, ere ąla ó betere ąla ąlakélé fea motóró yó fıpakalepó. Ti mió kelené keletere ąla ąla feata, kelere ąla sóró aleni, ama fọtokọ bole fonétóró kaaró beterapóló, dą Talepaae tué tiki tiró betereiteiné mo diriyóló kisiparapó.

⁴ Ebel ą tué tiki tiró bituraalu, Talepaae mo wisiyóló hałe maleiteiné noma Kein-né male ąla teterélipakalepó. Ti Ebel ą kisipa tiki tiró bitu matere ąla Talené kilitu, wisirapóló ą dukiróló mo donoı whıpó erapó. Ebel ąta, take suku-patei, Talepaae ama kisipa tirale ala ašemó mulu, dąpaae hałe du beterapó.

⁵ Inoke Talepaae kisipa tiki tirale betené ą sukuni, itéró mo betepatei, Talené hepen-paae dapesó horapó. Mepaae whırapené ą kekąlemó, Kótóné dapesó feleteiné mo koló fenipó. Kótóné buk-mó duraalu, Inoke ą hepen-paae faai i haemó

haḷe bitu, Kótóné ama kisipa mole ala erótu betepa, ʔ mo hekesené sinipakalepó.

⁶ Mepaae kisipa tirénire so whiné Kótó ʔ hekesese yaaire ala mo eranénipó. Ti noatepae, mepaae so whi de Kótó beterepaae wapa, ti ʔ mo beter-apóló kisipa tiróo, Kótó ʔ i betere ape yóló yó melaalopóló keteketa mo kekitu betere so whi kil-itu, Kótó ʔ mo hekeserapó.

⁷ Talené Noapaae take naao kilini yale ala nalopaae mo eraalopó yale fo Noané mopóló kisipa tiralepó. Atéru, ʔ tuamó Kótópaae mo kae wi yóló, ama naaleraperó atimané sorapetamo yóo, ama soma atimaamo yóo yóló beta aluyaqsóro, tué tiki tiró bitu nuku alipakalepó. Atéyaleteiné ai alimó betale so whiné dowaae fóló du betale ala mo só deralepó. ʔ atéro tué tiki tiratere ala Kótóné kilitu, mo donoi whipó yaaire doi melalepó.

⁸ Talené nalopaae Abraham ʔ melaaire hae kwiapaae fópóló, doteyaa ʔapaae ape yalepó. Ai fo depa, ʔ faaire tiki kisipa inirutei, tué tiki tiró betere alané Kótóné dere fo mo beta wosóló felepó.

⁹ Kótóné Abraham ʔapaae yale fo mo eraalopóló tué tiki tiróló, ʔ melaalopó ere hae tikimótei uké whi kaae bitu, kuti be torokóló teté kutu betalepó. Ama naale Aisak-kélé, Jekop-kélé, ama ere fo dokonóturaalu, ai hae tiki saaire whirapetei, Abraham ʔ yale kaaetóro deté kutu betalepó.

¹⁰ Abraham-ta, ʔ betere haemó kisipa muni, take nalopaae dirii ʔla sóro tene mo ti bemó betaalopóló kisipa mutu, kaae tawóló bitipakalepó. Ai be teyaa ʔale sóo, be teyóo yale sekéta, Kótó

atórótípó.

¹¹ Abraham ă mo ti otere yóo, soma Serakélé hăle ni daayóló sere yóo epatei, tuę tiki tiró betere ala Talené kilitu, naale deyaaire fotokọ bulalepó. Ti ai ala eraalopó yóló mulale sekéné fo mopóló kisipa tiki tiraletéiné yalepó.

¹² Ai betă whítei ă otereyóló mo felekemó sinaai du bitutei, ama deale naalené kaaróló, naale senaale mo hăle ọla kaae deté felepó. Ai naale senaaleta, sāmó daale hqreró wẹi atikătamo kaae ereteiné dosăyaaire mo sūnipó.

¹³ I dosăyale whĩrape atima fea kisipa tiki tiratere ala hăle deté fu betepatei, sukutua yalepó. Ti atima hăle betale alimó kale melaalopóló muló betere ọla atimané sinitei, mo umó teó wou betepa, tuéné maaté kolóló mo kée deté fu betalepó. Atétu, atimané duraalu, “Dăta haemó betepatei, i hae tale mei, uké whĩ kaae i betere ape,” du betalepó.

¹⁴ Atei kaae fo dere whĩrape atima mo ti betaaire hae tiki kekitu beterapóló hăkearóló yó matapó.

¹⁵ Tĩ atimané atei kaae dere fotamo, take taaróló wale hae tikimó uăsóró, ti atima turuku bepóló kisipa mutu, momó fesaae fole ala uăpó.

¹⁶ Aténi, mo ti betaaire hae wisipaae fenée kisipa mutu beterepó. Ai hae tikita, me kae mei, mo hepen betórótípó. Atéreteiné atima Kótópaae duraalu, yăta dă tětéróló kaae tare Talepó depa, ai fo wosetu Kótó ă haleni, mo dono dapó kisipa mutapó. Ti noatepae, ai be huluata atima mo wisiyóló beterópóló, ama taketi donoróló muló beterapó.

¹⁷ Abraham-né kisipa tiki tiró betere ala Kótóné k̄aae kolóló, s̄u sale sukamó, Abraham ̄a kisipa tiró bitu, ama naalema Aisak dóló simó suk̄ulaa dalóló Talepaae h̄ale melaai yalepó. Kótóné ̄apaae wisi ala eraalopó yale fo tūérutei, ama mo bet̄a betere naale daai yalepó.

¹⁸ Take Kótóné ̄apaae duraalu,

“Naao naale Aisak-né detere naalené naao doi muaaire fake firaalopó,” erapó.

¹⁹ Ti Abraham-né ama ai ala yaleteita, mo ti sukutere wh̄i Kótóné ama s̄umó kepaaraalopóló kisipa mutu yalepó. Até yaletei, ama naalema Aisak ̄a sukóló momó kepaayale wh̄i kaae ̄appa dape salepó.

²⁰ Aisak ̄a Talepaae kisipa tiró bituraalu, ama naale Jekop-ró Isotamo nalopaae betaaire alamó kisipa mutu, foné atimaamo wisiralepó.

²¹ Atéyale kaaetóro, Jekop ̄a Talepaae tūe tiki tiró bitu, ̄a felekemó suk̄aairaalu, ama dotó tiki tómó tiróló daalu, naalema Josep-né naale tamo foné wisiróló, Talepaae mo k̄ee yóló momayalepó.

²² Josep kisipa tiróló bitu, ̄a suk̄aaire be d̄e feleke depa, kale Israel fake so wh̄i Isip hae kwia taaróló, torokó faalopóló kisipa mutu, atimapaae ama diri sóro fae yalepó.

²³ Isip hae kwia t̄eteróló kaae tare topo wh̄iné Israel so wh̄iné naalerape dae yóló tukóló mul̄élipakalepó. Ai fo epatei, Moses-né hamaró alimatamo wini, Talepaae bet̄a tūe tiki tiró bitu, ai naale wisinaale daqsóro, w̄élié sore tūamó ̄a hyó mulalepó.

²⁴ Moses doayóló Talepaae kisipa tiki tiró bitu, ɔ topo whi Fero senaalemané naalepó yaqse yóló fo mulalepó.

²⁵ Moses ɔ sawa sukamó maaté tó tikimó felétere dowi ala yaai kisipa muni, Kótóné so whipaae erótu betere sekei ala ɔpaaekélé erópóló kisipa mutu, Talené so whitamotei toune felepó.

²⁶ Moses ɔ so whi teteróló kaae tare seké Kerisoné ala erótu beteremó, faleyóló haleratere ala kolósu, Isip haemó mole wisi wisi ɔla kolósu yalemó, Kerisotamo betere ala mo doasi ke boleteiné take nalopaae Kótóné dupu wisi melaalopóló kisipa mutu, ɔ ai ala sya felepó.

²⁷ Moses ɔ Talepaae kisipa tiró bitu, kale Isip hae kwia teteróló kaae tare topo whi fopaae buóló, ɔpaae sekei ala eraq́sórópóló wini, Isip kwia taaróló felepó. Ti noatepae, aita kelené kelenire seké ama kelereteiné, ama yaai dere ala betá hɔle yó taruraalu yalepó.

²⁸ ɔ Talepaae kisipa tiró bitu, Kótóné dotɔyale whi dele *ensel*-né Israel fakené topo naalerape daq́sóró, bosene fele be demó ɔla detere alaró wá *sipsip* hupu malené samea dilatere alatamo, Talené ɔpaae yae ala deté fu betalepó.

²⁹ Kótóné so whi Talepaae kisipa tiró bitu, sonaai wei kɔla tuamó tukóló, mo ere hae tiki kaaemó atima tɔyóló felepó. Tétepa, Isip fake atimakélé Israel fake yale kaae tɔyóló felemó, weiné atimatei mo ti alurélipakalepó.

³⁰ Talepaae kisipa tiró bitu, Israel fake so whi weikeró be demó, Jeriko be hulua bopére dopóku bolaa aq́ró bopé yóló kutu betalepó. Atéyalemó,

kale doasi dopóku ama kọleaanétei kolokóló dere-pelepó.

³¹ *Moni* saairaalu nópu nuku betale so Rahab ẹ Talepaae kisipa tiró bitu, kale bóe sẹ fele whịrape ama bepaae wisiyóló dape salepó. Téyaleteiné Talené fo tukóló dowaae fu betale so whị fea dóló kemeróturaalu, ẹ betẹ ẹsókó felepó.

³² Atimané ai yale alarapemó yalo kae me noa fo yaaloé? Kale doasi doi mole kisipa tirale whịrape Kideon, Barak, Samson, Jepta, Depit, Samuel, mepaae Kótóné kọlọ whịrapené yale alakélé fea diapaae dekéro uatei, yaaitere be de dekéro munipa taalatapó.

³³ Ai whịrape atima Talepaae kisipa tiró bitu, mepaae tẹteróló kaae tare topo whịrapetamo bóe dóló atima tẹteróo, so whị mo wisiyóló kaae taru donoi ala eróo, Talené atimapaae melaalopó yale ọla mo sóo yalepó. Atéro Talepaae kisipa tiró bituraalu, whị dó nokole haọ *layon*-rape kulumu faaralepó.

³⁴ Whị dokole doasi simi surukó fọo, whị dele fosói sepakekélé ẹsókó fọo, dua erapó. Atima mo whị bẹpatei, Kótóné doasi fotokọ bulalepó. Tétu, atima bóe duraalu doasi fotokóné kae kae hae kwiamó wale bóe whịrape dóló mo ti kemeratepa, mepaae ẹsókó fele whịrape ti botokó dapo yalepó.

³⁵ Mepaae sorape atimané naale senaale ó omarape sukaletei, momó kepaaratepa atimatamo betámó bitua yalepó. Mepaae so whị atima kisipa tiró betepa, mené doasi susupui ala eróturaalu, diẹ teraayóló faraalopa, Talepaae dowi

teka fo yae yóló sɛtua yalepó. Ai ala depatei, atima sukutepa, momó kepaayóló Taletamo wisiyóló betaalopóló kisipa mutu, atei kaae fo yaalo meipó, dua ipakalepó.

³⁶ Mepaae so whi faleyóló fokosoi ala yóo, mepaae so whi ti dirii képiné dokóló *dipula* beteróo dua yalepó.

³⁷ Mepaae so whi kapo duné dóo, mepaae ti ni tikitere *saw* fosóné fosóné tuamó tekéetamo yóo, mepaae bóe dele sepakené dóo, dua ipakalepó. Mepaae so whi hoko kuturaalu kutikélé nokole ɔla ó bekélé meitepa, *sipsip* ó *meme* hupu sekaɛ bukutua yóo, Atima mo yoleale betepa, susupui alaró kae kae dowi alatamo eróo dua yalepó.

³⁸ Atima atei kaae seke su betale so whi kolósu, i haemó betó mole mo so whi kolósu depa, seke sere so whiné atima mo belei aɔróló teraae falapó. Seke sere so whi atima torokó kuturaalu, kópu kaae fi tikimókélé, hasi fosómókélé, kapo dolomókélé, hae dolomókélé, hoko fité kutua ipakalepó.

³⁹ Ai dosɔayale so whi atimakó mo beta whínékélé Talené melaalopó yale ɔla sinipatei, kisipa tiró betere ala kilitu, Talené mo wisirapóló atima dukiralepó.

⁴⁰ Atimapaee erale alaró ɔapaee eratere alatamo, touróló eraté fóló mo ti kemerópóló, Kótóné atimapaee erale ala bosenóló, ɔapaee eraaire ala wisinaale ama tukóló mulalepó.

12

Kótóné ama naale senaale kópaee fupa,

donoróló deké sua dapó

¹ Térapa, Kótóné doasi alarape eratepa kelalepóló u bope deté wale so whiné dā bopéró beterapó. Atérapa, Talené atima tao sóró erale alamó kisipa tiratere kilitu, dā sururu yóló furaalu, mepaae bi pire ọla ọla taae falóo, dā hapale dée nópóló ekeleperatere dowi ala taalóo, yaalopó. Tétu, Talené muló betere dālemó sókó faairaalu, naase hāle sururu yóló fótóró tawíepe.

² Atéró furaalu, kisipa tiratere alakélé amatóró kaaróló, mo ti kemeratere alakélé Yesunétóró dua dapó. Térapa, dāné kelené ai seké ọtóró kikéyóló kaae tawíepe. Ti take nalopaae hāitere ala mo eratepa kelaalopóló kisipa mutu, ai seké ẹ filipaa ni tómó doasi sekéi ala sóo, halei ala eratepakélé me ọla meipóló hāle siré fóo yalepó. Atéyale kīlipaae ẹ hepen-paae fóló, Kótóné fea ala tẹteróló kaae tare tikimó, ama turu naase demó betalepó.

³ Ti take dowi ala dere whīrapené Yesutamo bóe duraalu, sekéi ala ẹpaae eratepatei, hāle beleté fu betalepó. Atérapa, diāpaaekélé sekéi ala eratepa, diā fomoyóló haepaae derepaqsóró, ama ai ere alatóró kisipa muae.

⁴ Mepaae whīrapené dowi ala fakerótu betepa, atei kaae dowi ala dorapóló diāné sesé deremó, diā dóló samea sókó fatere ala ini, teópó.

⁵ Ti diāta, Talené ama naalepóló ketekẹ bulótu, ere fo diaaọ kisipa keteró beterapó. Ai fo i ape.

“Yalo naale-ó, Talené yā donoróturaalu dóló supuratepa, ai bete munire ala dere nisi yaqse. Aita, diaaọ du betere dowi alamó diā foné sirapa, seké duraalu, hýyóló taalaqse.

6 Ti noatepae, Talené ama hosaa mulu yaala sókó fu betere so whi donoróturaalu dóló supuróo, ama naalepóló dape sere naalerape atimané h̄sókó fole alamó kwia melóo, dua dapó,” erapó.

7 Diapaae sekei ala erótu betepa, ti aita dīa Tal- ené ama naale donoróturaalu dere alapóló kisipa mutu, beleté fu betae. Ti mé naalekó donoi t̄upaae f̄ópóló, ama alimané foné sóró dele ala dumié?

8 Kótóné naale senaale fea h̄sókó fupa donoróturaalu, supuróló dua dapó. Dīa h̄sókó folemó, Talené dóló supurénitepa, ti dīa ama naale senaale bitini, h̄oko naale senaale ai ape.

9 Ai fotamo olekeyóló me dere fo i ape. D̄a fea k̄ópaae fole sukamókélé, mo h̄ale betere sukamókélé, sekei ala beleyópóló fotok̄o bulóturaalu, i haemó betere ayarapené d̄a donoróló supurótua deretei kisipa muae. Atétere alata, atimané mo dono dapóló kisipa mualepó. Ai ala mo ti bosenóló, d̄ané kepe t̄eteróló kaae tare Ayané d̄a donoróturaalu dóló supuratepa, ti ama erópóló ̄a aqmó sukóló betenérápó.

10 I haemó betere d̄ané mo ayarapené d̄a t̄u wisipaae f̄ópóló kisipa mutu, donoróturaalu sawa sukamó maaté dóló supurótua dapó. Tépat̄ei, d̄a Kótóné ama kae ere wisi ala tuamó beterópóló kisipa mutu, d̄a k̄ópaae fupa ama donorótu beter- apó.

11 Donoi t̄upaae f̄ópóló, supurate sukamó felé dumi, supu dua dapó. Téyaalotei, ai alané donoróló asa dere so wh̄ita, take nalopaae hosaa muni

deyóló mo dua betere alaró, mo donoi alatamo atima tuámó epa kelaalopó.

¹² Térapa, sekei alané diá fótururóló Talené ala diaaḡ erótu beteretei haepaae derepaḡsóró, bére hó naase fotokḡ bulatere ala du betae.

¹³ Diaaḡ doalére hó mo ti doyaḡsóró, diá kweyaaire tu mo wisiyóló aleyae.

Kótó hóróló sisópaae eraḡsóró hotowaró kaae tawae

¹⁴ So whi featamo bóe dóló hḡle sere ala ini, Kótóné ama hosaa muni deyóló dua betere alaró ama kae ere alatamo, diá tuapaae erópóló, ketekeḡ butu betae. Ti Kótóné ama mo kae ere ala munire so whita, Tale mo kelaalomeipó.

¹⁵ Diakó me whi ama hekesere ala sya fu-raalu, Kótóné hamokoróló hḡle tao sere ala haḡsókó faḡsóró yae. Tétu, diaaḡ ne notamo mutere dowi hasekḡai kisipa so whi feapaae tokóló, me whi doraḡsóró, mo hotowaró kaae tawae.

¹⁶ Diakó mepaae so whi nópu nokole ala ó Kótó faleyóló hḡko betale whi Iso kaae betaḡse. Ti Iso ḡta, alimané mómu ḡla ḡla saaire topo naaletei, ḡ wotepa ai mómu ḡlané betḡ be demó naaire ḡla nomatamo dupuyalepó.

¹⁷ Atéyale kḡlipaae kale sekéné ama alimapaee ḡkélé wisiraterere fo yae yóló woletamo yaletēi, alimané ama dere fo mo wosenipó. Atétepa, ḡ wole-tamo yalemókélé, ama tué tiki feteyaaire sḡni, mo hapólu yalepó.

¹⁸ Take Talené so whi fea touyóló bitu, kelené kolóló olaa dere hasi fosó erepó. Ai hasi fosómó

si dóo, be mo diliki yóo, doasi beséró hali tiki-tamo wóo, mepaae mo winé sini alakélé eróo, dua yalepó. Ti diąta, atére hasi fosópaae wénipó.

¹⁹ Ai hasi fosómóta, ukulumó wuti hale yóo, mené fo fakeyóló depa wosóo duraalu, atima atei kaae fo wosetere hórapa, me yaqse du betalepó.

²⁰ Ti noatepae, Talené atimapaee yóló mulóturaalu,

“Ai hasi daale felekepaae so whı́ ó hupu, na ó kae kae ọla fupa, ti kapo duné dóló sukunae,” ere fo atima wosaletiné faalo wiyalepó.

²¹ Moses-né ai hasi fosómó mo winé sini ala du betepa kolóló, i fo erapó.

“E mo winé sukuturaalu diri furu furu dapó.”

²² Ti diąta, atéyale hasi fosómó wóló bitini, mió dią betere hasiné doita, Saion-pó. Ti dią wóló ai betere tikita, hepen bemó Kótóné ama tẹteróló kaae tare doasi Jerusalem be huluapó. Ti diąta, *ensel-rape* ni sóku kaae mo dekéro touró bitu, hẹkesetu betere tuámó wóló ai betere ape.

²³ Aita, Talené ama topo naale senaalepóló sóro betero betere so whı́ fea touró betere tikipó. Ti ai so whı́né doita, hepen-mó aseýóló muló beterapó. Ti diąta, so whı́ feané dere ala taletere Kótó beterepaae wóló, ama take donoróló beteraleso whı́né keperape betere tikimó, ai betere ape.

²⁴ Diąta, ama so whı́ tao saalopóló yóló mulale kisi fo dirirale tuą whı́ Yesu beterepaae walepó. Ti ai sekéné ama samea so whı́né tikimó apuróturaalu yale foné Abel-né sameané doraee yale fo tẹteró beterapó.

²⁵ Diąpaae ai fo du betere seké diąné sisópaae eraqsóro yae. Ti noatepae, Kótóné kutó dirale mo

hae whiné so whípaae duraalu, “Diaaḡ hōko du betere ala taarénitepa, ti Kótóné kwia melaalopó,” dere fo woseni, sisópaae eraleteiné dowi kwia matere ala atimané mo salepó. Atérapa, hepen bemó betere sekéné dere fo sisópaae erateremó, atimapaee ai erale ala mo bosenóló, ḡapaae melaaire dowi kwia netéró ḡasókó faaloé?

²⁶ Take Talené ama fo yalemótei hae wore ipakalepó. Téyaleteti, mió ama i ala yaalopóló muló beterapó.

“Taketa, hae maaté yaḡo woreraleteti, mió ti saḡó haetamo wusuró woreraalopó,” erapó.

²⁷ Momó woreraalopó dere fo bete i ape. Wore ini, dirire alaró ḡla ḡlatamo ti enópóló, Kótóné aleyóló muló betere ḡla ḡla whaaló yóló wore deretei, ti ama woreróló mo aluraalopó.

²⁸⁻²⁹ Kótóné ama teteróló kaae tare alata, mené wore worekélé mo eranénipó. Ti ḡata, atére ala tuḡapaae fóló beterapa, Talepaae mo kée yóló, ḡa witamo ḡ aḡmó sukóló bitu, ḡekese yaaire ala betḡ du betaalopa sae.

“Ti noatepae, ḡa teteróló kaae tare Kótó ḡta, ḡla ḡla fea doló kemeratere si sḡ beterapó,” erapó.

13

Mo kemeróturaalu ketekḡ bulatere fo

¹ Mepaae no netamo yaala sókó fole ala hosaa mo turóné yó tawae.

² Uké wale whi diaaḡ bepaae wisiyóló dape sóró, ḡla melóló firatere ala taaréni, mo yó tawae. Ti noatepae, take mepaae whirape atima mo kḡleaa

whiné *ensel*-rapetei, mo whi nisyóló dape sua erapó.

³ Mepaae no nerape *dipula* betepa, ti diákélé atimatamo *dipula* betere aq yóló, atima kisipa hãle yó tawae. Tétu, mepaae whirapené naao no nepaae sekei ala eratepa, diákélé ai seke sere aq yóló, atima kisipa hãle yó tawae.

⁴ Soró whitamó dokotere alata, mo donoi alapa diã feané hale horótu betae. Whiró sotamo dokore ala folokole yaqsóró, so whi kaetamo fiyóo, whikélé so kaetamo fiyóo momókó yaqse. Ti noatepae, atei kaae nópu nokole alaró kae kae nópu nokole alatamo du betere so whita, Kótóné taleyóló dowi kwia melaalopó.

⁵ Diã betere tuamó *moni* mo doasi bete mole ɔla nisyóló diãné tué tiki turó ai ɔlapaae momókó mulaqse. Téní, meteró ɔla ɔla mupa, ti aitoró supóló kisipa muæ. Ti noatepae, Kótóné duraalu, “È diãtamo beteretei taaróló, metikpaae mo faalomeipó. Téturaalu, yãlo diã tao su betere alakélé hãle yótóró tawaalopó,” erapó.

⁶ Ai fo wosetu dã whaaliani, halaainé i fo dua dapó.

“Talené ama è tao sóró mo wisiyóló kaae tareteiné, mo whiné epaae noa kaae sekei ala eratepa è wiyaalomeipó.”

⁷ Take Talené alamó folosóró fóló, diãpaae Kótóné fo i ape yóló yó melale whirape atima Talepaae kisipa tiró bitu du betere ala kãae kolóló, noa kaae du wisi olepa, ti ai ala diãnékélé suróló yae.

⁸ Yesu Kerisoné ere alata, take bitiré walepaaekélé, mió i betere alimókélé, nalo

betaaire alimókélé, mo betá kaae alatóró hāle yó tarapó.

⁹ Térapa, mió diaaḡ wosetu betere fo wisi taaróló, kópaae falaairaa, mepaae wh̄rapené kae fo yó matepa, mo dere nisyóló wosaḡse. Kótóné keletómó wisirapó yópóló, ḡpaae moma yóló nuku betere ḡlané atima fotokḡ bulóló wisiraaire fotokḡ bunipó. Tépatēi, ḡa fotokḡ buóló wisiyóló beterópóló, Talené hamokoróló tao sere ala ḡa tuḡpaae eratepa, ai ke bole alané betá ḡa mo wisiranérapó.

¹⁰ I haemó mo so wh̄imó Talepaae momaratere wh̄rapené ḡané momatere kapo tómó bilitere ḡa naaire sunipó.

¹¹ Mo so wh̄imó Talepaae momaratere topo wh̄i *bulmakau* hupu samea sóró Kótópaae momaraai, mo kae tukóló muló betere be kepaae fóló, so wh̄iné dowi ala kemerópóló ai samea dilótua ḡapó. Tétua deretei, mo hupuné tikita, ti so wh̄i betere tiki taaróló, be bela ḡemó sukūlaa ḡalótua ḡapó.

¹² Atétere kaae, Yesuné ama sameanétóró so wh̄iné dowi ala kemeróló, mo kae so wh̄i beteróturaalu, ḡ doasi sekēi ala sóró doasi be hulua bolaare dopóku aḡmó sukālepó.

¹³ Térapa, ama tikimó sale halei ala ḡapaaekélé erópóló, be taaróló ḡ sukāle tikipaae faalopa fiépe.

¹⁴ Ti noatepae, ḡa mo ti betaaire doasi be hulua mekó i haemó tenipó. Téretei, take ḡa mo ti betaaire doasi be hulua kelaai kisipa mutu, ḡa kaae tawóló i betere ape.

¹⁵ Térapa, Yesuné ḡa fotokḡ bulatepa, mo wisi ḡa Kótópaae mótu dere kaae, Kótóné ama doi sóró horatere ala suka fea yó tawaalopa sae. Ti ḡa

teteróló kaae tare Kótó ʔ etei kaae Tale betepóló, ama doi sóró horatere alata, kutómó ʔa wisi su dere kaae erapó.

¹⁶ Mepaae ʔa ʔa yayatere so whi tao sóró matere alaró eratere wisi alatamo kisipa keteréni, hʔale yó tawae. Ti atei kaae alata, Talepaae hʔale matere ʔa wisi kaaepóló Kótó ʔ mo hʔeserapó.

¹⁷ Diʔ Keriso so whi kaae tare whirapené dere fo wosóló, atimané teteróló kaae tare aqomó betae. Take nalo Talené atimapaee so whi netéró kaae tawaleé? yóló wosetepa, atima etéró kaae tawalepóló tokó melaalopó. Atima kutó hʔesetamo diyópóló atimané dere fo wosóló sya fae. Ai ala initepa, ti atimakélé kisipa sekʔtamo dituraalu, atimané ditere kutóné diʔ tao sere alakélé yaalomeipó.

¹⁸ Talené dʔ tao sópóló momarótu betae. Dʔané du betere ala dʔanétei taleyalemó, so whi dilikitere ala me bunipó. Dʔané du betere ala fea so whiné taleyóló, mo dono ala dapó yópóló, i ditu betere ape.

¹⁹ Yʔalo diʔapaae i dere fota, ʔ diʔtamo betaai hapale wópóló, momarae yóló dapó.

²⁰ Kótóné so whi tao sóró mo ti muó tawaaire fo, Yesuné ama sameané diriróló mulalepó. Atéreteiné, bóe firóló mo dua betere ala kaarótu betere Kótóné, dʔ teteróló kaae tare whi Yesu ʔ momó kepaaró betepóló. Atéró kepaarale sekʔ ʔta, Talené *sipsip* hupurape kaae tare doasi fotokó bole topo whi betepóló.

²¹ Ai Kótóné ama kisipa mole ala diaaʔ mo sʔmó erópóló, amatei wisi wisi alaró wisi tuʔtamo diʔ tuʔapaae mo sʔraalo ai ape. Atétu, Kótóné ʔ hʔekese

yaaire ala Yesu Kerisoné dā tuapaae erópóló yae. Ai sekéné doi doasi mulóló, hale sóró horatere ala hale deté fu betae. Mo kée téyópóló yae.

²² No nerape-ó, yalo halekeróló i dere aseta, diaaḡ wosóló kisipa yaaitere sū i dere ape. Térapa, Kótóné ala etéró erae yóló ašemó ketekeḡ bulóturaalu, i deté wou betere ma fo wosaalo hó yaḡse.

²³ Dāné no Timoti *dipula* sókó wóló beterapóló, diāpaae i dere ape. A ẹ beterepaae hapale wapa, ti dāmo wusuró diā keḡle waai kisipa mutapó.

²⁴ Diā teteróló kaae tare whḡraperó Kótóné mo kaae beteró betere so whḡ featamopaae yalo kḡleó dapó yae. Itali hae kwiamó wale Keriso so whḡnékélé diāpaae kḡleó dapó.

²⁵ Talené ama hamokoróló tao sere ala diā fea tuamó muó tanópóló yae.

Yesu Kerisoné So Whi Tao Sere Kisi Fo Wisi

The New Testament in the Falopa Language of Papua New Guinea

copyright © 2005 Wycliffe Bible Translators, Inc.

Language: (Folopa)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-10-31

PDF generated using Haiola and XeLaTeX on 18 Mar 2025 from source files dated 31 Aug 2023

0102a9df-173c-5a64-b766-14ab67a86105